

五十



志卷第十八



高麗史六十四

正憲大夫工曹判書集賢殿大提學知經筵春秋館事兼成均大司成臣鄭麟趾奉

教修

禮六

凶禮

國恤

高麗人不立國恤之儀至國有大故則皆臨時采掇
附比以從事。已則諱而不傳故其見于史者持梗
槩而已。太祖二十五年五月丙午王疾大漸御神
德殿命學士金岳草遺詔有頃而薨太子諸王及宗
室近臣皆擗地哀號乃令百官列位於內議省門外

宣遺命惠宗即位群臣舉哀六月戊申發喪于詳政
殿宣遺詔己酉殯于詳政殿之西階庚午行祖奠太
常卿讀謚冊攝侍中元甫行礼賓令王仁濟奉太牢
之奠壬申葬于顯陵以遺命喪葬園陵制度依漢魏
故事悉從儉約 景宗六年七月王疾彌留甲辰
遺詔服紀以日易月十三日周祥二十七日大祥西
西安東安南登州等諸道鎮守各于任所舉哀三日
釋服丙午薨于正寢葬于榮陵成宗即位 顯宗二
十二年五月辛未王疾篤薨于重光殿德宗即位居
翼室朝夕哀臨甲戌王率群臣成服百姓立冠素服
六月丙申葬于宣陵群臣公除戊戌王釋服十月戊

寅宰輔表請復常膳許之元年五月己丑王以皇考
中祥祭齋七日居翼室涼閣反哭舉哀一如唐德宗
故事二年八月祔顯宗於太廟 文宗三十七年七
月辛酉王疾篤薨于重光殿殯于宣德殿是日順宗
即位八月甲申英文宗于景陵十月乙未王疾篤遺
詔在外州鎮官吏止于本處舉哀喪服以日易月薨
于喪次是日殯于宣德殿丙申宣宗即位戊戌王率
百官成服詣宣德殿行祭十一月庚申王親臨啟殯
哭盡哀葬于成陵二年九月壬子王親奠于順宗魂
殿九年九月壬午王太后李氏薨于西京歸葬戴陵
乙酉遼遣王禹耒賀生辰有司奏古典天子諸侯三

年之喪既葬釋服心喪終制不與士大夫同禮今賀
節使已至伏望以日易月二十七日後釋服迎命送
之十年九月丁丑王詣仁睿太后返魂殿行小祥祭
從晉制奉安神主于本殿 肅宗十年十月王還自
西京丙寅至長平門外以疾薨于輦中到西華門發
喪太子群臣哭踊奉入延英殿即日移殯于宣德殿
遺詔方鎮州牧止於本處舉哀服喪之制以日易月
是日睿宗即位甲申葬于英陵元年三月乙卯王詣
肅宗虞宮七年七月己巳王太后柳氏薨殯于大內
八月丙申葬于崇陵王祖送于闕庭十七年四月王
疾革丙申遺詔喪服以日易月方鎮州牧止於本處

舉哀成服三日而除遂薨殯于宣政殿仁宗即位朝
夕奠殯哭踊盡哀甲寅葬于裕陵七月己卯虞八月
壬寅虞十月癸卯虞十二月朔丙戌虞元年四月癸
巳小祥己酉虞十月乙酉虞二年四月甲戌祔于太
廟二十四年二月王疾大漸丁卯遺詔喪服以日易
月薨于保和殿是日毅宗即位三月甲戌王及百官
國人成服甲申葬于長陵癸巳王以下釋服丙戌虞
二年二月丁巳大祥 明宗三年十月庚申李義政
弒毅宗于雞林五年五月丙申發毅宗喪百官立冠
素服三日壬寅葬于禧陵十三年十一月癸未王太
后任氏薨殯于義昌宮旁私第王朝夕哭臨閏月甲

寅葬于純陵王導轎車自義昌宮步至彌勒寺釋服
十四年二月壬戌卒哭禮官奏按仁睿太后喪制一
依文廟故事卒哭之後上及群臣應帶紅鞋者皆服
皂帶今太后之喪亦依此制中書省駁議王后喪制
不宜與國王同王曰人子之於父母其心一也豈可
重父而輕母哉卒哭之後朕雖許卿等帶紅而卿等
宜引禮固辭况祥期之內朕嘗帶皂而卿等獨帶紅
耶夏四月壬申燃燈翼日大會觀樂燃燈上元事也
以國恤權停至是行之唯禁插花諸伎五月甲申金
祭奠使太府監完顏韋來初至西郊亭接伴使大將
軍張博仁舞蹈行上問禮韋以國恤舞蹈訊之曰何

失禮也博仁猶不悟丁巳王宴金使不入曰今日
之事是謂花宴况王既起服禮宜從吉結彩棚奏樂
插花可也不則不受享禮王使人答曰雖受起復練
祥未闋可從吉禮乎金使怒不赴宴六月戊辰宴金
竟不結棚插花奏樂八月王以嬖妾死久不御內人
訊之曰丁母后憂未五旬而復常膳今反乃尔何失
禮之甚也十一月甲午虞已亥設八閔會王觀樂于
毬庭以太后祥月除賀禮及舞蹈工人庭舞歌曲初
禮官奏仲冬乃王太后忌日請於孟冬行八閔禮王
以問相府叅知政事文克謙曰太祖始設八閔蓋為
神祇也後世嗣王不可以他事進退之况太祖禱於

神明曰願世。仲冬無令有國忌若不幸有忌則疑國祚將艾也故自統合以來仲冬無國忌今有之是國之災也而又以孟冬設八閔固非太祖意祀官所奏不可許從之翼日大會王又觀樂於毬庭十五年八月壬申行八虞祭十六年正月丙午附于太廟神宗五年十一月戊午明宗薨于昌樂宮宰樞及常恭官以上皂帶詣闕陳慰宗室百官及士庶人玄冠素服三日唯葬禮都監服至葬日乙巳金遣戶部侍郎李仲元來賀生辰十二月朔辛未王受詔于大觀殿先遣左承宣于承慶謂金使曰前王在殯迎詔及宴不敢舉樂金使曰迎天子之命豈可以私喪徹樂

乎遂用之丙辰宴金使先遣人告曰前王在殯未敢宴於正殿金使不聽再告乃許之閏月壬寅英明宗于智陵王初欲葬以王禮崔忠獻堅執不可降從其妃景順王后葬儀間用仁廟葬禮時太子斥在江華未得襄事國人哀之七年正月己巳王背疽御千齡殿詔太子嗣位是為熙宗丁丑薨戊寅殯于靖安宮崔忠獻會宰樞於其第議減祀司所奏服喪二十六日為十四日二月庚申葬于陽陵二年二月己未祔于太廟康宗二年八月王不豫丁丑遣詔易月之服三日而除薨于壽昌宮戊寅高宗即位九月丙寅葬于厚陵十九年六月朔庚戌王妃王氏薨百官玄

冠素服三日辛酉葬王后四十六年六月壬寅王薨
于柳墩第遺詔太子嗣位太子奉使未還間太孫監
國易月之服三日而除太子即元宗七月乙卯有事
于太廟以國恤除牲牢樂懸九月丙辰蒙古加大只
大等耒太孫傳令旨曰大朝使耒不可以凶服迎當
服皂鞋以迎其留使外館以待終制己未葬高宗于
洪陵太孫釋服元宗在元闡訃服喪三日而除元年
二月己酉燃燈太孫如奉恩寺除黃紅傘水精鉞
駕前儀仗及引駕其他諸王宰樞兩班士卒侍衛如
常儀入康安殿與諸王分坐東西看樂許諸王宰樞
文武兩班服吉服紅鞋三月甲申元宗還戊子即位

六月丙寅小祥十五年六月王不豫癸亥遺詔易月
之服三日而除藩鎮州縣毋得越疆奉遵朝廷哀制
至於科舉婚姻一切如舊薨于堤上宮八月戊辰潘
王至自元謁堤上宮謁殯殿己巳王幸本闕服黃袍
即位于康安殿是謂忠烈王九月壬午王詣殯殿始
服斬衰麻經率群臣哭乙酉葬于韶陵王釋喪服元
年十一月乙未王行七虞祭於魂殿二年六月乙丑
祔于景靈殿七月乙未祔于太廟二十三年五月壬
午安平公主薨于賢聖祠殯于壽寧宮令國中士庶
素衣白帽至癸八月丙午世子成服己未葬于高陵
三十四年五月王不豫七月己巳薨于神孝祠是夜

殞于淑妃金氏第八月壬子潘陽王自元未奔喪詣
殞殿入哭設奠百官以玄冠素服侍立甲寅潘陽王
服紫袍詣景靈殿告嗣位遂至壽寧宮即位是為忠
宣王九月辛卯王祭殞殿癸巳祭殞殿乙未王祭殞
殿大歛三臨盡哀百官皆編素停朝市十月丁酉葬
于慶陵諸司設奠道次祖送梓宮初發王哀麻經手
擎香炉步至十川橋乃乘肩輿至山陵奠訖率百官
大臨侍魂輿而返安于靈真殿二年九月丁丑祔于
寢園揖太尉大寧君崔有滄前一日詣靈真殿齋宿
其日早行告事由祭攝司徒政丞柳清臣典儀判事
李之氏與諸享官受祝版徑詣寢園百官具儀衛會

靈真殿門外叙立奉木主出安于輅密直二人坐于
前攝上護軍二人坐于後內侍常參二人又坐其後
百官前後導從至寢園太尉司徒及典儀判事先入
庭分列左右右上諸享官及侍臣入庭分立奉主去
輅就輿樂作及門樂止齋即奉主置拜位揖侍中俯
伏致告訖奉主復乘輿堂上執祀官引入正室先見
太祖次見惠顯二祖次見仁明二祖訖奉安于位堂
下樂作太尉洗爵初獻司徒亞獻典儀終獻其禮實
王之所制也 忠肅王二年十一月薊國大長公主
在元不豫十二月甲午薨康子樞東還仁宗皇帝命
中書省御史臺百官奠于道三年二月丙子公主喪

至百官立冠素服迎于郊殯于永安宮庫寅葬公主
十二年五月辛酉太尉王宣即王薨于燕即甲戌訃至
遣三司使尹莘傑萬戶姜融迎梓宮于平壤七月癸
酉梓宮至百官立冠素服郊迎殯于淑妃宮十一月
甲寅葬于德陵十七年六月丁未祔于寢園 忠惠
王後五年正月王在元丙子薨于岳陽縣閏二月己
巳訃至停朝市三日六月癸酉梓宮至八月庚申葬
于永陵忠穆王二年正月丁未奉安木主于魂殿五
月乙酉祔于太廟 恭愍王元年三月辛亥忠定王
暹鳩薨于江華七月癸酉葬于聰陵諸司一負服斬
衰奉安神御于宣明殿辛禍元年四月己酉祔于太

廟 恭愍王十四年二月甲辰徽懿公主薨輟朝三
日百官立冠素服置殯殿國葬造墓都監及山所
飯法威儀喪帷轎車祭器喪服返魂服玩小造棺槨
墓室鋪陳真影等十三色以供喪事又命諸司設奠
四月壬辰葬于正陵百官立冠素服送至陵及返魂
改吉服從還王手馮公主真日夜對日悲泣三年不
御肉膳二十三年九月甲申洪倫等弒王丙戌殯于
寶房辛禍與宰樞發喪舉哀十月庚申葬于玄陵百
官皆喪服秉燭導轎車前行諸司設奠道次禍以喪
服出演福寺西街迎拜肩輿前導至宣義門外拜送
平笠白衣乘馬而還百官至山陵奠訖以吉服返魂

於寶源庫 辛禍元年三月甲戌貞順淑儀公主薨
百官玄冠素服輟朝市四月甲辰葬于項陵百官又
玄冠素服送至山陵公服侍魂輿而返安于魂殿

陳慰儀

其日百官並皂鞋閣門先立殿門外東邊祇候分引
兩班中心為頭異位重行北向立定侍臣隨品交互
祇候引宰臣就褥位舍人喝宰臣兩班再拜閣使出
行詣宰臣右立宰臣搢笏跪進表閣使揖搢笏奉表
抽笏奉表入門揖落笏趨進一拜跪搢笏呈表于几
上膝退面拜趨退出門外揖就位揖云奉宣御寺所
慰已知舍人喝皆再拜祇候引宰臣出次引兩班出

訖閣門橫再拜行頭進步復位拜揖退

祔太廟儀

其日承宣開殿實魂殿都監判官秉燭先升梯匱筵
跌几踏臺訖太祝入室啟匱出神主安于跌上行告
祔廟祭訖太祝入室奉神主還安匱內闔戶而出承
宣封室戶儀伏樂部列於門外尚舍設褥位于殿庭
指諭牽龍各著錦衣陪腰輿署褥位上又設褥位于
外庭置綵帛樓子又設褥位于大門外置大輅于褥
位南承宣重房備身將軍指諭內侍茶房序立于內
紫門階下執礼命尚贊閣門祇候引傘扇入陳于外
庭侍臣左右分立宰臣密直一行西上太史局奏時

負報某時承宣門室戶攝侍中詣匱前跪奏云請降
座升輿內侍一員奉靈匱一員奉跌几太祝宮闈令
奉神主匱降自西階安於腰輿殿侍衛及巡檢寺陪
立次殿中禁服其服左右分立指諭牽龍陪立于紫
門階上次承宣重房備身將軍內侍茶房詣諭肅拜
訖殿都知着錦衣奉銃于左右分立陪腰輿出門外
小駐舍人喝宰臣密直左右侍臣肅拜訖揖侍中跪
請降輿升樓于安于樓于如前儀進行至大路前禱
位小駐攝侍中跪請降樓于升輿安于輿上如前儀
舍人喝百官再拜勅侍奉員將文武兩班上馬黃門
侍即奏上馬舍人喝百官再拜訖上將軍一員佩刀

就輿前三奏神主路上行李萬福升祔太廟再拜訖
密直二員上將軍二員內侍恭上四員恭乘密直輿
外前面上將軍後面別監輿內稍後左右陪奉到太
廟外駐輿乘恭官俱下前到享官肅拜訖輿至門外
攝事中跪奏請降輿升輿安于輿上如前儀尚舍于
門外先設幕次幕前設褥位腰輿到褥位上以樓于
邊之尚舍別監捲簾安于幕內床褥上如前儀廟庭
執禮侯廟內諸事畢詣幕次舍人喝宰樞侍臣再拜
叔退引腰輿置幕前褥位上別監又捲簾廟庭大祝
奉神主位安于腰輿齋即陪腰輿贊者引人廟門廟
庭執禮曰魂殿侍衛員將人吏掌固退散出門外再

拜退散後齋即寺陪腰輿入安于廟庭東邊褥位大
祝齋即奉木主歷見太祖而下先王先后訖入安于
當祔之室享官行祭礼畢闔戶而出祔景靈殿儀倣
此

上國使祭奠贈賻弔慰儀

文宗之喪宋遣祭奠使左諫議大夫楊景略副使礼
賓使王舜封弔慰使右諫議大夫錢勰副使西上閣
門副使宋球來祭奠使設奠于魂殿使副就位執事
告陳設畢使副即席再拜使搢笏焚香酌酒讀祝文
本國上陪官捧祝文俛伏與使副再拜訖嗣王向闕
立使稱有勅嗣王再拜使口傳宣訖嗣王再拜使搢

笏捧贈賻詔書嗣王跪受俛伏與祭奠礼畢弔慰使
副少進嗣王向闕立使宣有勅嗣王再拜口宣及授
弔慰詔書並如祭奠使儀訖與祭奠使副展慰陳狀
如常儀仁睿太后之喪金遣太府監完顏鞏未賜祭
將祭鞏問曰太后畫像坐耶立耶對曰坐鞏曰諸侯
王毋坐而天子使拜可乎必藏影幘乃入行事王遣
人陳諭再三鞏從之王立庭下鞏登堂再拜奠爵安
平公主之喪元遣火魯忽孫未弔王與世子素服短
帽黃帶群臣玄冠素服與火魯忽孫入臨殯殿
先王諱辰真殿酌獻儀
其日質明礼司奏初嚴所司陳伏衛于殿庭内外如

常儀樞密以下左右侍臣就大觀殿庭文武百僚就
泰定門外立班以侍俟中詣宣仁殿門版奏外辦禮
司奏二嚴王出御大觀殿鳴鞭內外伏衛大喝再拜
舍人喝樞密以下左右侍臣再拜次閣門負引宰臣
就拜位舍人喝宰臣再拜西出黃門侍郎就庭中俛
伏跪奏請動駕奏訖俛伏興退復位王降殿升輦出
利賓門外禮司奏三嚴出泰定門黃門侍郎出就輦
前俛伏跪奏請駐輦俛伏興舍人喝文武百官再拜
次黃門侍郎復就輦前俛伏跪奏請勅侍臣百僚上
馬侍中傳宣曰可黃門侍郎俛伏興傳侍臣員將文
武兩班宣許上馬傳訖舍人喝樞密以下侍臣及近

臣百僚應騎馬者俱再拜訖黃門侍郎復出俛伏跪
奏請動駕俛伏興退復位鳴鞭侍臣前導出昇平門
前後導從應騎者皆乘馬駕至真殿門外降輦入帳
次殿內酌獻並與燃燈小會駕幸儀同酌獻時宰臣
以下文武百僚皆着皂鞋
成宗八年十二月教太祖及王考戴宗王妣宣義王
后忌日禁屠殺斷肉膳 請宗三年七月壬戌以王
妣元成太后諱辰百官就乾德殿上表陳慰諱辰陳
慰始此自後考妣諱辰宰臣進表三品以上黑帶假
紅以下犀帶陳慰如儀 文宗三十一年五月甲戌
王以顯考忌服素襪避正殿令中外斷音樂禁弋獵

終月 恭讓王三年正月辛丑禮曹啟曰安慶公溫以元王母弟篡立元朝遣使奉元王復位則溫不當稱為英宗亦不當載諸祀典今遇忌日致祭有乖大義請罷之且忠肅王妃洪氏乃忠惠王恭愍之母后忠惠王妃尹氏乃忠定王之母后以正統君王有後之妃迄今不祀實為闕典乞兩妃忌日及真殿祭享悉依近代先后禮從之

上國喪

顯宗二十二年七月己未契丹報哀使工部郎中南承顏未告聖宗喪宣詔于顯宗魂堂辛酉德宗引契丹使舉哀于內殿十月辛巳遣工部郎中柳喬如契

丹會葬 文宗九年九月癸亥契丹告哀使鴻臚少卿張嗣復來告興宗喪王聞嗣復過鴨綠江減常膳徹音樂禁屠宰斷弋獵禮司奏禮世子不為天子服又童子不總乞太子及樂浪開城國原族並不服平壤公以下文武常恭以上服喪從之乙丑王服素襪率百官出昌德門前嗣復傳詔舉哀行服輟朝市三日丙子遣知中樞院事崔惟善工部侍郎李得路如契丹弔喪會葬 仁宗十三年二月辛丑金報哀使檢校右散騎常侍王政來告太祖喪百官玄冠素服癸卯王受詔與國人服喪三日閏月丁未報哀使還附表陳慰乙卯遣少卿金瑞侍御史李時敏如金弔

喪十四年二月丙辰金遣使來告太皇太后喪舉國素服三日丁卯遣殿中監尹彥植左司諫崔允儀如金弔祭 明宗十九年正月金世宗崩三月戊午遣奉慰使及祭奠兼會葬使如金己未金遣使來告喪庚申王素服率百官迎詔于都省廳奉哀四月壬戌釋服二十一年二月乙未金遣完顏臣來告皇太后喪遣大將軍韓正修即中崔敦禮如金弔喪大將軍文得呂司業李世長致祭丁酉王率群臣發喪于都省 熙宗四年冬金章宗崩五年正月丁酉遣奉慰使史洪紀祭奠使李淳中如金 忠烈王二十年正月癸酉世祖皇帝崩王與公主以羊十馬一祭于殯

殿二十六年正月丙寅皇太后崩四月庚戌遣同知密直司事薛景成如元弔喪戊午王如元弔喪六月癸酉王祭太后殯殿 恭讓王四年六月己卯王聞大明皇太子薨欲發喪廷臣啟曰皇太子未成為君不可服喪於是輟朝三日百官布帶

隣國喪

太祖七年九月新羅王昇英薨未告喪王奉哀遣使弔之

諸臣喪

高麗大臣之卒賻贈恩恤極為優厚然其儀制未詳略舉其見于史者以著其凡 太祖十九年十

二月大匡裴玄慶疾篤王親幸其第問疾王出門而
玄慶卒王駐駕命官庀葬事而後還 成宗六年三
月內史令崔知夢卒王聞訃震悼賜布千匹米三百
石麥二百石茶二百角香二百斤官庀葬事贈太子
太傅謚敏休八年五月守侍中崔承老卒王慟悼下
教褒其勲德贈太師賜布千匹麵三百石粳米五百
石乳香百斤腦原茶二百角大茶十斤十四年四月
平章事崔亮卒王慟悼贈太子太師賜米三百石麥
二百石腦原茶十角以禮葬之謚匡彬 穆宗元年
七月內史令徐熙卒賜布千匹麩麥三百石米五百
石腦原茶二百角大茶十斤梅香三百兩謚章威以

禮葬之七年六月侍中韓彥恭卒賜米五百石麩麥
三百石平布八百匹中布四百匹茶二百角贈內史
令謚貞信以禮葬之 顯宗八年五月戶部尚書金
殷傳卒輟朝一日後贈侍中十五年六月平章事崔
沆卒王悼甚賻絹三百匹布五百段米麥千石謚節
義二十二年八月侍中姜邯贊卒輟朝三日謚仁憲
命文武兩班會葬弔誄賻贈加禮 靖宗八年六月
內史令徐訥卒王御重光殿廊下奉哀貴臣奉哀與
諸王同其異者一奉哀而止耳 文宗元年十月
平章事皇甫穎卒賜米百石麥五十石布四百匹大
茶三百斤香十斤 肅宗九年九月叅知政事朴寅

亮卒賜弔慰教及誄書贈賻以禮謚文烈 睿宗五年七月平章事李頴卒輟朝三日遣使弔祭官庀葬事謚文良十年二月中書令崔忠諷卒王震悼輟朝三日賻恤優厚令百官會葬謚忠景 仁宗十四年十一月樞密院知奏事鄭沆卒王悼甚輟朝弔祭賻米百石布二百匹御筆特謚文安 毅宗十一年二月平章事高兆基卒輟朝三日命有司護喪賜謚明宗十六年四月政堂文學崔汝諧卒官庀葬事輟朝三日謚文貞十九年九月平章事文克謙卒輟朝三日謚忠肅 高宗四年三月樞密副使蔡靖卒官庀葬事以賞平賊之功六年八月崔忠獻死十二月

丙子以忠獻死輟朝三日 元宗四年十一月永安公僖卒五年四月辛未以僖卒輟朝三日十四年九月平章事張佶卒十一月庚子以佶卒輟朝三日 恭愍王十七年密直副使李岡卒王悼甚賜厚賻樞密例不得謚特謚文敬

五服制度

斬衰三年給暇百日正服子為父女子在室及已嫁而返室者為父義服妻為夫妻為君加服嫡孫父卒承重者為祖父曾玄孫承重者為曾高祖齊衰三年給暇百日正服子為母加服嫡孫父卒承重者為祖母曾玄孫承重者為曾高祖母公族以下三日而葬十

三月小祥二十五日大祥二十七日禫祭齊衰周年
給暇三十日正服為祖父母為伯叔父及妻為姑姊
妹在室為姊妹適人無夫子為兄弟為長子及妻為
衆子及女子為姪及姪女在室為嫡孫及嫡孫女為
嫡曾孫庶母為其子及君之衆子降服父卒母嫁父為
後者報服如之義服嫁繼母為子外族正服為外
祖父母義服為繼母慈母義母長母為妻大功九月
給暇二十日長殤正服為伯叔父及姑為兄弟姊妹
為子及女子為姪及姪女為嫡孫成人正室為堂兄
弟為姊妹在室為衆子妻為庶子及妻為姪妻降服
為姑姊妹姪女適人外族正為舅為姨在室小功五

五月給暇十五日正服為曾祖父母為伯叔祖父母
為從祖母姑在室為堂伯叔及妻為堂姑在室為兄弟
妻為再從兄弟為再從姊妹在室為堂姪及堂姪女
為嫡孫妻為姪孫及姪孫女在室為嫡曾孫妻殤正
服為伯叔父及姑之中殤者為兄弟姊妹之中殤為
子及女子姪及姪女之中殤為嫡孫之中殤為衆孫
之長殤為嫡曾孫之長殤降服為堂姊妹適人外族
正服為舅妻為外甥及外甥女在室義服為妻父母
為女壻總麻三月給暇七日正服為高祖父母為堂
伯叔祖父母為再從伯叔及妻為再從姑為兄弟妻
為親表兄弟及姊妹為再從姪及姪女在室為堂姪

孫女為曾孫女為衆孫女為曾姪孫為嫡玄孫降服
為從祖母及堂姑適人為再從姊妹及姪孫女適人
殤正服為伯叔父及姑之下殤為堂叔堂姑之長殤
為兄弟姊妹之下殤為堂兄弟姊妹之長殤為子及
女子姪及姪女之下殤為嫡孫之下殤為衆孫之中
殤外族降服為姨及外甥女適人正服為堂舅為舅
姨兄弟及姊妹為外甥妻為外孫義服為庶母乳母
凡五服聞喪給暇三分之一有剩日入暇限成宗四
年初定此制十一年六月制六品以下不入常恭官
父母喪百日後所司勸令出仕除起復銜以黻服哭
角遙謝行公十五年七月定朝官遭喪給暇式忌暇

各三日每月朔望祭暇各一日小大祥祭暇各七日
大祥後經六十日行禫祭暇五日 穆宗六年六月
制五品以下官吏父母喪百日後所司勸令出仕即
上讓表不允遙謝後起復結銜以黻服與角出仕
顯宗九年五月制文武官遭喪第十三月初忌日小
祥齋給暇三日其月晦日小祥祭給暇三日第二十
五月二忌日大祥齋給暇七日其月晦日大祥祭給
暇七日自翼日計六十日至二十七月晦日禫祭給
暇五日二十八月一日以吉服正角出官行公十九
年四月制京外官吏父母喪大祥齋後禫暇前依前
出仕 靖宗三年正月制外仕及東西兵馬官吏之

妻在京身死令坊里報吏部除奏聞并行喪式限行
移界兵馬使及界員無事時則所管事體酌量許令
上京以為恒式又官吏及軍其人等有父母墳墓改
葬者給暇三十日未往程途其官遠近參酌施行六
年八月制各道服起領軍員當驟服者杖著吉服正
角還軍歸家依制驟服九年六月制罪不及孥前典
彝訓誅殺人等無罪之子禮當行服其三年大喪依
制行服其他五服勿令給暇 文宗三年九月丙申
制外方官吏遭兄弟姊妹喪者若在遠州除申請京
官直于外官請暇妻父母服不論妻之先後並令給
暇四年正月制外官父母在京身死除奏達許令上

京軍興時則所管事體高量兼考兵馬使給暇移文
酌量裁決其別命員及隨使記事者亦依此例八年
正月制防禦官父母喪百日已滿以吉服正角遙謝
赴任二十二年十月制嫁母之儀前式無服然人子
不服其喪似忘劬勞膝下之息自今行百日服後以
吉服正角出仕三十年六月制先亡有後之妻及同
居妻父母服制依式給暇三日三年八月制外任官
大祥^祭給暇外方立魂堂者許于魂堂在處行礼仍留
行禫以吉服正角還任九月制奉使入朝官吏父母
身死回還後雖已過百日自聞喪日給暇百日三十
五年二月制諸州縣長吏受武散階者小喪依制給

暇以下以尊信義葬時給暇三十七年十二月制宮
城內各衙門官吏黻服出入不合儀制函服者不入
公門之義宮城外官准資換任其不得已任宮城官
者依書儀入朝但吉服之文入宮城吉服歸家依制
行服 宣宗二年六月制異國投化官吏父母在本
國身死自聞喪日依制給暇六年十二月制嫁母之
服前制只給百日暇其餘心喪嫁母自有區別其大
祥祭外任之子勿許上京 睿宗五年三月制起復
外官異朝使臣迎接者權着吉服正角 仁宗十四
年二月制同宗支子及遺棄小兒三歲前托付收養
者為收養父母並服三年喪遺棄小兒仍繼其姓同

宗支子為親父母期年異姓族人之子收養者服喪
之制禮雖無據恩義俱重不可無服其令服大功九
月四十九日 明宗十四年七月制文武入流以上
者妻之父母依親伯叔之妻齊衰周年給暇二十日
忠烈王三年正月辛卯中贊金方慶持妻母服命
權宜後行宰相服制後行古無其例時軍國務繁始
有是命七年四月庚午教士卒雖遭父母喪過五十
日即從軍 恭愍王四年十二月辛未罷三年丁
憂之制六年十月辛巳諫官李穡等請行三年喪從
之八年十二月辛未以兵興除忽赤忠勇三都監五
軍三年喪九年六月丁亥命百官親喪三年八月丙

戎教四方兵興軍務方殷其除三年喪制前此雖許行三年喪然百衰經之習如舊但解官不仕而已

恭讓王三年五月庚子更定服制一遵大明律服制式惟外祖父母妻父母服與諸伯叔同無後人以三歲前遺棄小兒冒姓付籍者即同已子以其同宗之子親近為先繼後者亦許行服三年之喪天下之通喪自今許終其制其中關係國家要務必合起復者啟聞取旨奪情起復大小軍官及不許丁憂者止行百日喪其父母喪二十五日內每月行朔望祭至十三月初忌日行小祥祭二十五日第二忌日行大祥祭二十七日晦行禫祭二十八日始服吉

服喪三年內不許取婦及宴飲四年四月甲戌除軍官三年喪

百官忌暇

景宗六年十二月制父母忌日依書儀一日兩宵給暇 成宗元年十二月制百官遇父母忌給暇一日兩宵祖父母忌無親子則亦依父母例 顯宗十一年閏六月制無親子祖父母忌日除廢人外文武入仕人並給暇一日兩宵 文宗三十年六月制先亡有後之妻及同居妻父母忌日依制給暇 明宗十四年七月制文武入流以上者妻父母忌日依外祖父母式一日兩宵給暇 恭讓王三年五月庚子教

近設家廟既合六品以上祭三代自今許行曾祖考妣忌日之祭

重刑奏對儀

王便服出生內殿南廊牽牛都知肅拜訖承宣重房院房六局負次肅拜閣門去靴笏着絲鞋皆侍臣入庭橫行自喝再拜行頭進步復位各祇候後左邊立刑部奏對員省即丹筆員入庭舍人喝再拜出外祇候引宰臣樞密至門執禮傳引就褥位立定執禮微喝再拜執禮承傳云賜座執禮微喝再拜引上殿坐東邊褥位茶房恭上員從夾戶上進茶內侍七品員去蓋子執禮上殿前楹外面拜勸茶放後下殿次院

房八品以下進宰樞茶執禮又上殿伏面請茶出次丹筆奏對員入奏丹筆制斬決除入有人島畢後御藥及宰樞藥執禮引宰樞下庭褥位微喝再拜執禮承傳云宣賜酒果執禮微喝再拜引出奏對員省即丹筆員入庭舍人喝再拜執禮承傳云宣賜酒果舍人喝再拜出次閣門橫行再拜執禮云侍奉員將宣賜酒果舍人喝再拜執禮舍人皆再拜以次出

軍禮

遣將出征儀

遣將出征宜大社告太廟茲有司行事如奏告之儀出錢還錢王皆親告景靈殿前一日尚舍局設王位

於大觀殿如常儀設元帥副元帥禱位于殿庭中心
北向守宮署設元帥副元帥次于殿門外朝堂其日
依時刻伏衛入陳于殿庭如儀樞密及左右侍臣入
就殿庭位元帥副元帥皆服戎服前一日有司奉宣
書兵部准舊例頒賜元帥以下從軍文武員寮率兵馬鈐轄充之承制及諸軍
從事官俱詣殿門外重行北向立訖王服絳紗袍出
坐殿鳴鞭伏衛奏山呼再拜訖舍人喝樞密以下侍
臣常起居訖閣門引宰臣入就位舍人喝宰臣再拜
訖閣門引宰臣自東側階升殿近東西向北上立次
引宰樞自西側階升殿近西東向北上立訖引元帥
副元帥入殿庭就禱位北向立舍人喝元帥副元帥

再拜閣門稱有勅舍人喝再拜躬聽口宣訖舍人喝
元帥副元帥再拜閣門引元帥自西階升殿進王座
之右稟諸方畧上將軍奉斧鉞詣王座右跪進王降
座執斧鉞授元帥、跪受降自西階閣門引元帥
副元帥由正門出即將傳奉斧鉞在前先導閣門引
兵馬鈐轄及諸軍使副判官以上入殿庭重行北向
東上立舍人喝鈐轄以下再拜又再拜訖閣門引自
西偏門出錄事以下於殿門外禮數如上儀王入內
殿宰臣樞密以下左右侍臣及伏衛以次出元帥副
元帥出泰定門外樂作至兵部樂止鈐轄以下諸軍
使副判官于階上俱重行再拜錄事以下階下祇揖

吏拜訖便行師如軍令式

師還儀

師還前一日尚舍局設王座于大觀殿設元帥副元帥拜位于殿庭守宮署設元帥副元帥次于殿門外朝堂又于宿庭設元帥副元帥座于東邊筵伴宰臣座于西邊又設拜命禱位于庭中筵伴到宿亭閣門引元帥以下出門相揖入門各就禱位鈐轄及諸軍使副判官錄事每等異位重行立定舍人喝元帥以下向闕再拜問聖體舍人喝元帥以下再拜筵伴口宣訖舍人喝元帥以下又再拜訖閣門引筵伴及元帥副元帥各從東西階升亭上就禱位立定執礼官

交呈起居狀筵伴及元帥起居訖閣門引各就座赴旁宴礼畢閣門引筵伴及元帥副元帥以下降就庭中禱位舍人喝元帥以下再拜奉元帥奉謝表詣筵伴前跪進筵伴上前接表俱退復位舍人喝元帥以下又再拜訖筵伴以表傳于持函者先出元帥及筵伴行出門相揖分位其日畫亭設筵伴公侯伯座于東邊元帥副元帥座于西邊其餘命拜旁宴附表礼教如上儀元帥勒所部兵衛鼓吹令押凱歌分左右二部以次陳列鼓吹振作至廣化門樂止依時刻禁衛入陳于殿庭如常儀樞密以下左右侍臣入就殿庭位元帥副元帥率諸軍寮佐至殿門外閣

門引元帥副元帥入次訖近臣奏外辦王服絳紗袍
出坐殿禁衛奏山呼再拜舍人喝樞密以下侍臣常
起居訖閣門引宰臣入就位舍人喝宰臣再拜訖閣
門各引宰臣樞密自東西側階升殿就位立閣門引
諸軍使副判官錄事諸領府即將以上入殿庭每等
異位重行立定閣門引元帥捧斧鉞入殿庭自西階
升殿詣御座之右跪上斧鉞王降座執斧鉞傳授上
將軍訖元帥降自西階就拜位舍人喝元帥以下再
拜閣門引出殿門外元帥副元帥及諸軍使副判官
錄事從事官各服公服閣門分引元帥以下入就殿
庭重行北向立定舍人喝元帥以下再拜舞蹈又再

拜奏聖躬萬福舍人喝元帥以下再拜元帥出行致
辭復位舍人喝元帥以下群官再拜舞蹈又再拜訖
近臣承旨降自東階詣元帥東北西向傳宣稱定難
功業惟朕乃嘉元帥以下再拜舞蹈又再拜閣門傳
宣賜酒食舍人喝元帥以下再拜舞蹈又再拜訖閣
門引元帥以下西出王入內殿宰臣樞密左右侍臣
及伏衛以次退

睿宗二年十月壬寅命尹瓘為元帥吳延寵副之往
伐女真十二月朔壬午王御威鳳樓瓘延寵率三軍
將士以次入庭拜訖賜鈇鉞遣之三年春瓘等平女
真築六城立碑于公嶮鎮以為界至四月己丑瓘延

寵凱還命鼓吹軍衛迎之遣帶方侯備齊安侯偕勞
宴于東郊璿等詣景靈殿復命還鈇鉞王御文德殿
引璿延寵上殿問邊事未幾女真侵犯六城之地四
年四月命副元帥吳延寵復征之戊寅延寵陞辭王
詣景靈殿親授鈇鉞遣之 仁宗十三年正月西京
反命金富軾討之甲寅王御天福殿富軾以戎服入
見命陞上親授鈇鉞遣之十四年二月戊午西京降
四月庫子富軾凱還王詣景靈殿告平西賊賜富軾
甲第一區 高宗三年閏七月契丹寇西北境轉
掠州郡十月命叅知政事鄭叔瞻為行營中軍元帥
樞密院副使趙冲為副往擊之十二月己未幸順天

館御文德殿群臣入謁分立左右叔瞻冲以戎服率
諸摠管入庭行礼王親授鈇鉞遣之 恭愍王五年
五月遣評理印璫等徃攻鴨江以西八站九月癸未
以曲城伯廉悌臣為都元帥刑部尚書柳淵等副之
以備西北賜貂裘金帶授鈇鉞遣之十三年二月戊戌
西北面都元帥慶于興都巡慰使崔瑩等卻德興兵
凱還王命有司郊迓如迎賀儀十八年十一月辛未
以守門下侍中李仁任為西北面都統使賜大纛以
遣之

救日月食儀

其日應陪侍群臣並玄冠素服伺候王素服出生綬

床承宣重房肅拜訖分立閣門入庭橫行再拜行頭
進步復位揖左邊立祇候引樞密就褥位橫行立定
舍人喝再拜訖分立王入歇待時刻復出下殿立尚
舍別監點香王拜禮後還上殿閣使承傳云賜樞密
坐舍人喝再拜閣使又云賜侍奉自將坐舍人喝再
拜就坐救日訖王下殿尚舍別監點香王拜禮訖還
上殿入內 文宗元年二月乙亥朔日食御史臺奏
舊制日月食太史局預奏告諭中外伐鼓于社上素
襴避殿百官素服各守本局向日拱立以待明復今
太史官昏迷天象不預聞奏請科罪沒之
季冬大儺儀

大儺之禮前一日所司奏聞選人年十二以上十六
以下為侏子著假面衣赤布袴褶二十四人為一隊
六人作一行凡二隊執事者十二人著赤幘禱衣執
鞭工人二十二人其一方相氏著假面黃金四目蒙
熊皮玄衣朱裳右執戈左執楯其一為唱帥著假面
皮衣執捧鼓角軍二十為一隊執旗四人吹角四人
持鼓十二人以逐惡鬼于禁中有司先于儀鳳廣化
朱雀迎秋長平門備設酒果襍物又為瘞瘡各于門
之右方深稱其事前一日夕儺者各赴集所具其器
服依次陳布以待事其日未明諸衛依時刻勒所部
屯門列伏入陳于階下如常儀儺者各集于宮門外

內侍詣王所御殿前奏俵子備請逐疫訖出命儺者
以次入鼓譟以進方相氏執戈揚楯唱率俵子和曰
甲作食磁赫胃食疫雄伯食魅騰簡食不祥覽諸食
咎伯奇食夢強梁祖明共食磔死寄生妻隨食觀錯
浙食巨窮奇騰根共食盞凡使十二押追惡鬼凶赫
汝軀拉汝肝節解汝肌肉抽汝肺腸汝不急去後者
為糧周呼訖前後鼓譟而出諸隊各趣門而出郭
而止儺者將出大祝布神席當中門南面出訖齋即
陳神座籍以席北首齋即酌酒大祝受而奠之祝史
持版于座右跪讀祝文祭以大陰之神訖與奠版于
席乃舉禳物并酒瘞于壇訖退

靖宗六年十一月戊寅詔曰朕即位以來心存好生
欲使鳥獸昆虫咸被仁恩歲終儺祀磔五雞以驅疫
氣朕甚痛之可貸以他物司天臺奏瑞祥志云季冬
之月命有司大儺旁磔土牛以送寒氣請造黃土牛
四頭各長一尺高五寸以代磔雞從之 睿宗十一
年十二月己丑大儺先是宦者分儺為左右以求勝
王又命親王分主之凡娼優雜伎以至外官遊妓無
不被徵遠近至旌旗亘路充斥禁中是日諫官叩
閣切諫乃命黜其尤恠者至晚復集王將觀樂左右
紛然淨先呈伎無復條理更黜四百餘人

志卷第十八



卷之三